

# O LE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

IULAI 2019

email: [sulusamoa@cccs.org.ws](mailto:sulusamoa@cccs.org.ws) -Main Office: Ph. 24414, Ext 30 - website: [www.cccs.org.ws](http://www.cccs.org.ws)



## Nisi ia o Faifeau Toeaina ua Penisione Malolo

Susuga i le Toeaina ia  
Tautiaga Senara (FT)  
ma le Faletua ia Olita  
Senara. Sa galulue i le  
Aulotu EFKS i Matautu  
Falelatai.

Susuga ia Utufua Naseri  
(FT) ma le Faletua ia  
Taiaopo Naseri sa  
galulue i le Aulotu  
EFKS i Apia.



# FAASINO UPU

1.	FAASINO UPU	2		
2.	LAUGA	2	-	4
3.	PEPA FONOTELE 2019	5	-	9
4.	FETU'UTU'UNA'IMUNIAO	10	-	11
5.	ANOFALE FAALEAGAGA	11		
6.	ITULAUMO TUPULAGA	12		
7.	TALAMO TAMAITI	13	-	14
8.	O E UA FAI ILAGILE FOLAUGA	15	-	16
	1. Tuaimalo Papaliitele Pisimaka Leota To'omata			
	2. Sesilia Tuaimalo Mani Vagai'a			

## O LE LAUGA

Tusi Faitau: Luka 19: 33-44

Matua: LUKA 19: 42 “Ana e iloa, o oe lava i lenei lava aso, o mea e manuia ai! Ao lenei ua lilo i lau vaai.”

Manatu Autu: **O le talalelei i le fiafia ae faanoanoa.**

### Faatomuaga:

O le lalolagi ua tatou iai nei, o se lalolagi o le fiafia. Tatou te naunau e fiafia o tatou aiga ma nuu. O Samoa foi ua tumu i faailoga o le ola fiafia o ona tagata. A faaeaina, e fiafia. A tini taunuu foi se faamoemoe sa lavasi iai, e fiafia.

A maua foi se mea lelei a le aiga e tausami i le afiafi, ua atili ai ona fiafia.

Peitai e iai foi le faanoanoa. Ua uso tuofe lava ma fiafia. Talu lava ona ofi mai le saolotoga i le maeataalo a le tagata, ma faataga ai e le Atua lona saolotoga, ua faapena lava le olaga ua tatou fananau ma soifua ai. O le taimi o le ata o le fiafia.. ao si taimi foi o le loimata o le faanoanoa.

### Tusi Faitau.

E le taumate le lofia o le Alii o Iesu i lagona ia e 2. Fiafia & Faanoanoa. Ua filifilia foi le tusi o Luka e fai ma tusi faitau, auā i le

mataupu leni e 19, e tumatilatila lava le sosoo e Luka o le tala ile fiafia ma le tala i le faanoanoa ao faamatala le amataga o le vaega faaiu o le galuega faaola a Iesu i le lalolagi. O lana malaga lea i Ierusalem ma maliu fasia ai.

**Manatu 1.** Fiafia: O Iesu o le tagata sa fiafia.

I le liutino tagata o le lokou. E le taumate na afio mai le Alii MALE FIAFIA..

Molimauina foi lona fiafia ao feagai ma lana galuega talai, galuega faaola. Pei se tagata ua mafua lona fia tala'i ma lona fiafia e faaola i tagata, ona o lona fiafia.. E le mafai ese tagata ona matua naunau i lana galuega, e aunoa ma sona fiafia i lana mea o fai. Tatou vaavaai i le

# O LE LAUGA

molimau a le au-sinopi e faatatau lava ia Iesu le A'oa'o tala'i - fiafia.

Ioane 15: 11- Faamauina ai le fiafia/ olioli o le Alii e feagai ma ona tiute. Ina ua uma lana faataoto i le vine ma ona la... ta'ua e Ioane le fetalaiga a le Alii i lona fiafia....

“Ua ou fai atu nei mea ia te outou, ina ia tumau ai lo'u olioli ia te outou, ia atoatoa foi lo outou olioli.” Sa fiafia ma olioli le Alii.

I le faaaoga ai foi e Iesu le faaupuga i le faigofie i le kamela ona sao atu i le pu o le au ae faigata i le mauoa ona sao i le malo ole lagi. Fai mai e susesue i le Tusi Paia, pei se faaupuga malie e masani ai tagata Iutaia. Foliga oni talasua. Ua le gata i lea, ua faapena foi le faaupuga, 'eu ese muamua le ogalaau i lou mata, ona faatoa faamasino ai lea i le utupoto i le mata o lou uso.' Peiseai ni gagana faalumuluma e faaaoga e talasua ai tagata o le maketi. A o upu ma tala ole fiafia. Lona uiga o le faaaogaina ai e Iesu, o le faaaliga lava lea o lona fiafia e talasua i tala malie, o tala o le fiafia. E anoa ana a'oa'oga i le mauoa ma le tagata faitio, ae ua malie lava faatalasua le faiga o ana tala ua molimoli mai ai le feau.

I le tapena ai e Iesu le to'a 70 e o atu e fai le galuega tala'i. na vavala mai ai foi nisi o foliga fiafia ma fai tala malie o le Alii.

Luka 10, ina ua foi mai le to'a 70 ua mae'a le galuega tala'i ma lipoti mai ia Iesu, fai mai latou ia Iesu, “Le Alii e, ua ususita'i mai temoni

ia te i matou..” f.17, ae tali atu ma le talasua le Alii, “Na ou iloa Satani, ua pau mai le lagi pei o le uila.” f.18.. I lea faauigaina, peiseai e foliga faapea le tali fiamalie a le Samoa i se gugutu a seisi foi Samoae le'i molimau i se mea na tupu. “Sole a e vaai i la'u taalo i le taaloga o le talita, o au na faia uma sikoa a le matou 'au.” Ae tali atu leisi. “Ae a, na ou vaai atu lava ua malolo uma le tou au ae na o oe a na taalo.” O suaga i le agaga o le fiafia a ni uo e masani, ao tala o le fiafia.

A manatu foi i le fiafia o tamaiti e lolofi ia Iesu, e mafua lava ona o le FIAFIA o foliga o le Alii.. E le mafai na fiafia tamaiti e sōsō ia Iesu, pe ana faapea o le Alii se tagata mata sauā.

O tamaiti Samoa e pipii tele i aunties ma uncles e laumata fiafia, ma talia fiafia i latou. Ao uncles ma aunties e matapaū, mata faasiasia, e sesegi ma tumamao ai.

I le aoao tetele, e le taumate sa tumu le Alii o Iesu ile fiafia, ao feagai ma le galuega.

Manatu 2.. **Faanoanoa; O Iesu o le tagata sa faanoanoa.**

E tufaafegagai fiafia ma faanoanoa. Ui lava o Iesu sa fiafia, peitai sa faanoanoa foi o ia e tusa ma molimau o ona talaaga. I le tusi sa faitauina, ua ta-aofa'i se faanoanoaga o le Alii i lona agai ai i Ierusalem e taualuga lana galuega. E le faapea faatoa lagona lea o lona faanoanoa.

Ae tusa male tala a Luka, ua maua le asini e ona soo ma faatietie ai Iesu, ua tuanai atu le folasia o lavalava ma laupama i le ala ma faafeiloai le afio mai ole Tupu o Tupu (Luka 19:36-40). Na fai ane foi nisi ole au faresaio ia Iesu, “Le a'oa'o e, ia e a'oa'i atu i ou so'o”. A'oa'i atu ona ua latou viia oe peiseai se tupu.... Ona tali lea o le Alii “a le feganavai i latou nei, e gagana mai lava o ma'a.” (f.40) A faapu'upu'u, o le taimi ole fiafia, e le tataua ona faalavelaveina. O le tali foi a Iesu i faresaio, faaalua ai lona manatu e le tuta'ia lava le fiafia o tagata i le Alii. Aisea e vaoia ai pe a fiafia?

Peita'i na so'o tuaoi lea vaaiga fiafia o le tala ma le vaaiga faanoanoa i le faanoanoa loloto ai o le Faaola ina ua vaai atu ia Ierusalem ua latou le amanaia o ia i le aoao tetele. E lua vaega ua soso'o tuaoi e Luka. E iai lona feau taua.

Fai mai lana upu... f.42 “Ana e iloa, o oe lava i lenei lava aso, o mea e manuia ai! A o lenei ua lilo i lau vaai.” A faapuupuu, Ierusalem e ua misi ia outou manuia. E iai le aso e oo mai ai puapuga ma e lailai ai i faiga a le fili. Aisea? Aua ua e le talia le asiasi mai o le Faaola e faaola le lalolagi. Upu a le Alii o Iesu o upu o le faanoanoa.

Manatu .. Folasaga Autu. **Tulimata'i Iesu na ui mai ai.**

O le galuega talai a le Faaola, sa faia ma le fiafia, peita'i na tutui o ia i le pelu o fita ma faigata ma tumu ai o ia i faanoanoaga. Sa le'i soona fiafia le Alii nei mitavale, e lei faatagaina foi lona faanoanoa e lelemo ia te ia. I lona aga atu i le

# O LE LAUGA

satauro seia oo ina faataunuuina, o se taimi na tino ai le sauaina o ia ma puapuagatia tele ai. Peitai ane ua faaopopo le matuitui o ia mea uma ona ua tauave faatasi ma lona faanoanoa. O le mafuaaga tupito lava o lona faanoanoaga, o lona le-amanaiaina lea e le lalolagi. E tiga le sasa, peitai e sili na ogaoga ma matuitui lona faanoanoa i le le amanaiaina o ia. Peitai sa lei manumalo na mea ia te ia.

## Faatatau.

Le au faatuatua e i le Alii ma tagata uma o le Atua, o lea lava le natura o le soifuaga ua tatou iai. Na fai ia fiafia, peitai e le mavae ma faanoanoaga. E taavivili faatasi lava lagona nei e lua. O le faamanatu, ia lava le onosai. Taula i le Atua le loto, ia lava onosaia ai faanoanoaga pe a seu mai lo tatou fiafia. O Keriso na seu lona fiafia e le faanoanoa, peitai na ia onosai pea ma loto faatuatua, ina ia tini le taulaga faaola mo le lalolagi.

Mo tatou uma e faatuatua, onosai e fili faatasi lava fiafia ma faanoanoa. Ae a faatautai e le Alii

o tatou faanoanoaga, e taunuu i le fiafia.

Mo le faigaluega i le galuega tala'i aemaise le galuega faamisiona a le Talalelei, ia tatou loto tetele e le na o le fiafia ma olioli e maua i le galuega nei.

Na omai lava i Fiti i le nota o le olioli... fiafia ma sagisagi e galulue mo tagata Samoa o faaunuuua i Suva nei. Peitai ua tutupu mea ogaoga i le galuega ua fai ai lava ma mea patupatu i le fiafia.

Ua faatele ona osofa'ia le nofoaga o le Lotu i Suva nei, i le falesa e tutu faatasi ma le maota o le galuega ma siomia e le pa-uaea. O nisi lava o tagata osopa ua fia aai tele i 'ulu ma popo o le fanua ae le fia faanoi. Ao nisi, ua osopa mai lava ona o la latou masani lea, o le talepefale ma le lima tagovale. Ao lona lumafale, ua fai lava le aualatele ma nofoaga e taula mai iai teine ma faafafine e faia le masani o le talitane. O ia luitau ua faaopopo ai lava le taavilia o le Misionare i tiute o le saogalemu,

a ua faatupuina ai lava le faanoanoa.

Ae ui lava i ia faanoanoaga, e lototele lava mo Keriso ma lana galuega. E le uma lava le fiafia i le galuega. Ai lava na faapea le fesuisui ai o lagona ole Alii o Iesu, i aso o soifua ma galue, o le taimi ua fiafia, o le taimi ua faanoanoa. Atonu o se faamanatu foi lea mo soo se tasi o tuta'ia lona fiafia ona o mea tutupu i le olaga.

Tatou loto telele.. e pei ona feagai Iesu ma faanoanoaga e ui ina sa tumu lona loto i le fiafia i lona Tama. Fai lea ma faamafanafanaga mo soo se tasi o mafatia ma faanoanoa ao tautiga mo mea lelei i soo se tofi ma soo se faiva.

O Keriso na oo lava i le satauro, puapuagatia, maliu ma toe tu... peitai na toe tu o ia, liua ai le faanoanoa le-tumau i le fiafia-tumau mo tatou uma pe a oo mai le toe afio mai.

Manuia tele lau faitau... Amene.

Faafetai,

**Siu Vaifale FS**

**(Misionare Fiti)**

*"Ua inosia ma tuulafoaiina o ia e tagata; o le tagata faanoanoa, ua masani foi o ia ma le tiga; e peiseai ua alo ese mata mai ia te ia; ua inosia o ia, ma ua tatou le manatua lava o ia. E moni ua na tauave o tatou tiga; ma na tauave o tatou faanoanoa a ua tatou manatu o ia ua taia, ua fasia e le Atua, ma ua faatigaina.*

*A ua manu'a o ia ona o a tatou solitulafono, ua momomo o ia ona o a tatou amioleaga; o le a'oa'iga e filemu ai tatou sa i ona luga lea, o ona faalavalava foi ua malolo ai tatou."*

**Isaia 53: 3 - 5**

---

# PEPA FONOTELE MALUA 2019

---

## “Faaaliga o le Mana o le Silisiliese”

### *Revealing the Power of the Most High*

---

**EKALESIA**  
**FAAPOTOPOTOGA**  
**KERISIANO SAMOA**  
**FONO TELE MALUA 2019**

**O LE MATAUPU:**

**“FAAALIGA O LE MANA O  
LE SILISILI ESE”**

*(Revealing the Power of the  
Most High)  
(Tanielu 7: 18)*

**TA’UTINOAGA:**

Ou te fai atu i lo’u to’alua e fesoasoani mai i le taumafaiga o la’u pepa, ae fai mai, “Tago oe e fai, e le o sa’u pepa.” Ona tagi uu lava lea o le loto, ma taumafai le pepa nei.

O lo’u olaga atoa a o lei nonofo ma le toeaina, o a’u o le lotu Pope/Katoliko Roma mao’i. Ua musu le Toeaina EFKS e fesoasoani mai i le taumafaiga o lenei pepa, o le mea lea, faamalie i le tofa mamalu a le Fono Tele, o le a faa-lotu Pope si a tatou mea..

‘I le Suafa o le Tama, ma le Alo, ma le Agaga Paia..Amene!  
‘Ia faatasi le Alii ma outou! Ia faatasi foi le Alii ma a’u nei!’

E le o se faa-lotu Katoliko Roma la, a o la’u tatalo faatauana i le Agaga Paia o le Keriso Toetu, ia alofaina e le Alii le Fono Tele a le Ekalesia 2019, **ma faaaliga ai lona Mana Silisili Ese.**

**FAATOMUAGA**

Lau Afioga i le Ta’ita’ifono, le Mamalu i le Laulau a le Fono Tele

faapea le mamalu o le fono usu a le Ekalesia 2019. Faagafua ia le tulaga ma magalo le leo o le auauna faatauavaa, o a’u o le sui o le Mafutaga Aoa o Tinā, ua feagai ma lenei tofiga auā le Fono Tele.

Faatalofa atu! Malo le soifua maua.... faamalo le soifua manuia! Onosai ma faamalolosi le Usuga-fono....toe lava o ni nai aso, ona maea lea o le Fono Tele o lenei tausaga.

“Ia i le Atua pea lona viiga e le aunoa!”

Ua faatau i le lagona, le mataupu lea ua faailoa mai, lea ua fai ma Autu o mafauauga o le Fono Tele- **“O le Faaaliga o le Mana o le Silisili Ese!”**

Tanielu 7:18 – **“Ae maua le malo e le au paia a le Silisili Ese, e fai foi mo i latou le malo e faavavau, faavavau lava...”**

O le upu moni, ua tele finagalo ma le faamalamalamaina o lenei mataupu e isi foi sui, o e ua uluai saunoa mai lava i le amataga. Manatu foi, ua tamaoiga le silafia ma le faafofoga a lenei Fono Mamalu. Manatu foi, e le toe mamafi i le Ekalesia se manatu faatauavaa o se tinā EFKS, o le a sauni penisione.

Peitai, o la’u lenei vaavaai faa-tinā ole EFKS i le faali mai o le Mana ma le Silisili Ese o le Atua.... 46

tausaga, talu ona ou galue i le Ekalesia ma galue tausuu (ma lo’u to’alua), i le galuega.

**O NAI MALALA OLA MU  
ITL...PEA OGA?**

Ma te o atu i le Galuega (Te Atatu, Aukilani, NZ), ua 29 ou tausaga, ae 35 le toeaina, (ua matua lava si alii, faifaiupu mai...) O la ma galuega tausuu muamua lea. Ma te o atu, ua i ai le fale o le galuega (faafetai), ae faasa ona tumutumu ai ni tagata e fai mea a le lotu, ona o loto o tagata tuaoi (e le ni Samoa), atoa ma tulafono a le City Council.

Na ma taunuu atu ia Setema 14, 1984; ae Kerisimasi ...Tesea 25. Mate le masani i faiga o mea a Niu Sila (auā ma te o atu i Samoa nei), faapea lava ma’ua... o le Hall a le Council o la matou te faaogaina, a oo i le Kerisimasi, ua o le Council e malolo ae tuu pea le Hall matou te lolotu ai. E le i ta’u maia foi e se isi o le aulotu. Ma te toe iloa ane e...toe lua aso fai le Kerisimasi....ae fai mai: “Poo mai iloa e tapuni uma fale o le Council i taimi o le Kerisimasi ma le Tausaga Fou?” Ua ou tilotilo atu i lo’u to’alua ua mou vave ona foliga faa-faifeau na ma o atu ma ma’ua, a ua foliga i le tagata fia-tu’i tagata. Ua fai ana nanu le-lelei faa-afakasi e faailoa ai, ua tumu i le ita. Ona soso malie atu foi lea o le teine Lotu Pope, ua faufautua... Meamanu le aulotu, e to’avalu lava nai Aiga na avatua ma’ua; e le faigata ona tala’i i se mea e fai. Ua fai le tonu faavave, tofuu mai le

---

# PEPA FONOTELE MALUA 2019

---

## “Faaaliga o le Mana o le Silisiliese”

### *Revealing the Power of the Most High*

---

Aiga ma le fala-lilii/fala papa, fua fala a le Aiga i le aofai o tagata. Ao le Aulotu foi, e na o le 28 tagata...toalima lo ma aiga ma si a ma fanau, ona 33 lea. E eeeeasy lava.

**Ae o le lotu o le Kerisimasi....**o le a fai i fafo i luga o le mutia, i le valevalenoa o le Po malulu, i si avanoa itiiti i tua o le fale... ua fola ai fala, avane ma le laulau ‘ai (tulou), ua fai am pulelaa. A o lea po, o le susulu matagofie ia o ataata o le masina (o NZ foi e le iloa lelei se susulu o le masina, auā e malamalama faasoloatoa i moli o le aula tele); ae ai lava o se mea na faia e le Atua fai-vavega. Ai lava o lona Mana Silisili Ese lea....Auā o lea po, e lei mana’omia se malamalama o le lalolagi; e lei mana’omia se faatagaga a ni tagata; ua moli loaloa i le masina o le foafoaga; ua susulu mai le malamalama o le Pepe o le Kerisimasi, ua iloa ai e le Faifeau upu o le Tusi Paia; ma le mea nana faia...e pei se lauga.

**“Ua uiga ese lava lea po...!”**

E fesili atu foi i le aulotu pe i ai se isi e i ai sana extension cord, ae na o le pulato’a mai...ua atili tetele ai ma pupusa malosi le faatuatua o si o’u to’alua...(hahaha). O le susulu o le moli i tua-fale (Security light), na iloa ai upu o Pese ma le faitauga o le Tusi Paia. O le po lena, na ou molimauina ai le tutulu/tagi leotele o lo’u to’alua, ua popo lona fatafata ma valaau-augani ma le leotele i le Atua, **“Le Atua e, ou te le toe fia tapuai atu i lou ‘mamalu’ ma lou ‘mana silisiliese’.....i se tapuaiga e osi i fafo i luga ole mutia, i le malulu**

**o le po. Ua mafatia ou tagata. Foai maia se eleele ma se fale mautu, sei fai atu ai le tapuaiga ia te Oe!”**

#### **Tou te silafia le Ekalesia:**

a. E valu masina i le Galuega, ae foai mai e le Atua le fanua tele, ua tu ai nei le lotu (upu moni), i le ogatotonu o le aai o Te Atatu Penisula.

e. I totonu o le uluai ono tausaga, na maea ona fausia ai le falesa muamua, a o lei alu le malologa.

i. E lei tasi se falesa na aumai e le Atua mo le aulotu.

o. Sefulu tausaga mulimuli ane ai, ae toe fau le isi falesa e tele atu...ua lua falesa tetele ma le mautu, o le Hall, Car parks, ma le Fale o le Galuega, sa foai mai e le **Mamana, le Mamalu ma le Mana Silisili Ese o le Atua**, mo ona tagata.

u. Ua toatele le aulotu. Mai le toavalu Aiga na avatua ma’ua, ua silia ma le 40 matafale, i lena vaitau (1984-2000).

f. Sa aumai nei falesa e lua i totonu o le uluai 18 tausaga o le Galuega. Ua vaavaai tagata lolotu o lenei Aiga-lotu, **i lea lava Mana, ma lea lava Silisili Ese...uiga ese.**

**Le Ekalesia pele e...** o la’u lea uluai vaai faa-tinā ma le molimau maumaututu, i le mea e ta’u o le **Mana ma le Mamalu Silisili Ese o le Atua**, ua tapili faavave ai se faatuatua tau amata o se tagata lotu ese; a ua fai ma to’alua o se Faifeau EFKS.

Tulou le Ekalesia paia, e le lele le manu ma lagi ona lava vii...tofa malie.

#### **SE ISIMALALA OLA - O LE MAMANA SILISILI ESE O LE ATUA**

Ua ono (6) nei tausaga talu ona taunuu mai se tagata Musalemi (Muslim), i lo ma Aiga; ua fai nei ma atalii o le Toeaina. Na sau lea tagata e sue se Faifeau (o lana tala...ua fia maua se Pastor); o lana upu, **“Ua ou fia ola! Ou te le fia oti. Ua ou fia iloa IESU!”**

O le aso tonu lea, na alu ai le Musalemi lea ma lana ‘apa penisini/karasini i se Car park tuufua a se tasi ekalesia tu-a-uta, e susunu ai lona tino...ma pule i lona ola (o le faalua ai lea ona taumafai):

- Ua mamao ese ma lona atunuu ma lona aiga i Iran (Peresia anamua) ..o le refugee i NZ.

- Ua **ola-le iloa** i totonu o Niu Sila; i se olaga...ua na o ta’aga ma tuinanau o le tino ua ola faatasi ai ma tagata sa latou masani ma faauo i ai.

- Ua le-mautonu lona mafaufau i se olaga, ua na o le ‘ava malosi ma le tagofia o fualaau-faasaina; o lona toalua, o se sitiseni NZ ua toe sosola lava ma lana uo, o se tagata NZ foi.

- O se fitafita o le taua sa tau i le taua lava mai i le va o **Iran ma Irag...** ua oso ane le lagona ua le fefe i le oti, **ua na o le fia pule i le ola**, le lagona ua oso mai; ae sa ia faalogo i le tala ia **Iesu...** *“e malolo ma maua ai le filemu, pe a liliu atu ia te IA.”*

- Ae...o se vavega lava na faia e le Mana Silisili Ese o le Atua. Faamatala e lenei Musalemi- o le aso tonu lea ua leva ona fia oti. Ua i lona lima le apa penisini ma le afipenisini; toe lava ina sasaa e

---

# PEPA FONOTELE MALUA 2019

---

## “Faaaliga o le Mana o le Silisiliese”

### Revealing the Power of the Most High

faataele ai lona tino atoa, tutu ma faatala-li loa. Masalo o se oti muamua lea faapea i totonu o Niu Sila, pe ana oo ona faatino.

- O le mea na tupu...ua leva ona fia oti, ae ua faalavelave le tamaloa na alu atu **faafuasei** i lea lava taeao, e moa le fanua o le aulotu. Ua faatali faatali, te'a atu ai lava ma le fia oti, ona o le faaumiumi o le moa-ga-vao.

- Ua toe sui le mafaufau. Sa savali ane loa i le pusa-telefoni o loo i tafatafa o le auala; ua faasolo lona lima i le lisi o igoa o faifeau (Reverends) o i le tusi telefoni; ma tau ane ai i le Reverend a lou to'alua (ae le masani).

- Sa telefoni mai ma fesili: Poo oe o se Pastor? **“Ua ou fia ola. Ou te le fia oti. Ua ou fia iloa IESU!”**

- I le taimi nei, ua tagata ekalesia. Ua uma ona papatisoina. Ua auai i le aiga o le Faamanatuga. Ua ia talia Iesu o lona Faaola. Ua lotu EFKS. E toaga tele i le lotu.

- O lo o auai mai i lenei Fono Tele. O loo sau e faamavae ma faatofa faatasi ma le Ekalesia i lona 'tamā', o le a penisione.

#### SE MANATU LAUTELE

**O le a le fesootaiga o nei malala ola...ma le Faaali mai o le Mana o le Silisili Ese (le Atua)?**

O a'u o se tinā lotu ese, e ese le a'oa'oga faale-faatuatua sa ou tupu ma ola a'e ai. Ua ou vaavaai ma iloa, ai lava o le mamana ma le mamalu Silisili Ese lea o le Atua, e

faaaliga ai lona lava MANA i soo se soifua ma soo se tagata...pe a tuuina atu atoatoa ma ofoina atu mo IA...o a lava mea faigaluega e tutupu ma faafeagai.

Ua ou ola, tautua ma auauna i le faatuatua i le EFKS, e pele pea (e le ona o lou faatuatua i le Alii, ae ona o lou fefe i lou to'alua haha).

#### FAASOLO INA FAAIU LE PEPA.

Ina ua vaavaai ma molimauina e Serupapelu le Mamana ma le Silisili Ese o le Atua, ina ua faatonu e le Agaga o le Atua e ala ia Kuresa e toe fau le Malumalu o Ierusalem (auā o lea ua amata toe fo'i ma taliu mai le tafeaga)...Sa fefe Serupapelu, sa le Mautonu, ua palaai, ua mau ona faalogo i **upu a tagata mai tua atu o le nu'u; tagata e le i le nu'u; tagata e le lolotu i le EFKS a Iuta, ae na o le faufau mai; tagata e mumusu e mautu le Galuega...ua na o le faasa-sa mai...faiga a le tiapolo e sailiili auala e taia ai lagona taofiofi mamau o tagata o le nuu o le Atua** (mo tatou i aso nei, o ala a le tiapolo e musu e mautu le faatuatuaga o le EFKS i lana misiona).

Na faatonu e le Atua Serupapelu...aumai le **ma'atulimanu** e tuu i luma o le mea o fai ai le galuega, ia vaavaai pea i ai i aso uma, ina ia iloa atili ai le **mamalu ma le silisili ese o le Atua**; e faamanatu mai ai ma

faamalosi mai ai; ia lototetele, taofimau i le Atua, fau ia uma le galuega.

Manatu foi Ekalesia, o le **ma'atulimanu**, e le tu'ua muamua i se amataga o se fauga o se galuega tele faapei o se malumalu. O le mea mulimuli lava lea e faapipii atu, e taula i ai sooga uma o le fale-a-luga, i ona poupou ma ona laau faalalava, e taofimau ai le Galuega **ia mausali, ia atoatoa, ia maopopo, ia malosi, ia le toe tau maluelue**. A o lea ua faatonu e le Atua Serupapelu, **“aumai e tu'u muamua; a o lei faia le galuega”**

O fea se mea ua tuu muamua le vaega e tuu-faaiu ma taualuga i ai le galuega, a o lea ua faatonu e le Atua Serupapelu, **“aumai ia faamuamua ma faasili; taofimau ma faamautu; aua lava nei te'a ese ai!”** (*Esera 2:2ff; Sakaria 4:6-9; Efeso 2:20ff*)

**O le a le uiga o nei mea?** Pau le ma'atulimanu lea ou te manatua, le ma'a lea na faimai ai Tavita (*Salamo 118:22*)... **“O le ma'a na lafoaiina e tufuga fai fale, ua fai lea ma ma'atulimanu aupitoaluga.”**

Ae na manatua lelei ma molimau foi i ai Mareko (*Feagaiga Fou*), i le ma'a lava lea (*Mareko 12:10*)... **“O le ma'a na lafoaiina e tufuga faifale, ua**

# PEPA FONOTELE MALUA 2019

## “Faaaliga o le Mana o le Silisiliese”

### Revealing the Power of the Most High

*fai lea ma ma’atulimanu aupitoaluga. O le mea lea na faia e le Alii, tatou te ofo ai pe a vaavaai atu i ai.”*

E lei faafiti ai foi Paulo, ae na ia leotele ai i tagata o Efeso talu le agasala ua tele i le ma’a lava lea...(Efeso 2:20-22)... “(o outou foi)...ua atiina ae i luga o le faavae o le au aposetolo, atoa ma le au perofeta; o le ma’atulimanu, o KERISO IESU lava lea. Ua faatatauina ia te IA le fale atoa, o loo alu ae, ina ia fai ma malumalu paia o le Alii. O outou foi, ua atiina ae faatasi outou ia te IA e fai ma afioaga o le Atua, i le Agaga.” (W..O..W..!!)

I le Tusi a Tanielu (Tanielu 7:18), o loo tau faamatala ai e Tanielu lana miti i manu fea’i tetele e fa, ua feosofi ma aliali a’e solo mai le manava o le sami tele; e eseese le tasi i le tasi.

(i) O le manufe’a’i muamua (leona) – ua faatatau i le malo tele o Papelonia

(ii) O le manufeai lona lua (urosa) – ua faatatau i malo o Metai ma Peresia

(iii) O le manufeau lona tolu (nameri) – ua faatatau i malo o Eleni (taimi o Alesana le Sili)

(iv) O le manufeau lona fa (o le manu ua mata’utia ma ua ma’a’a; e matua malosi lava; e uamea foi ona nifo) – ua faatatauina i le malo o Roma.

- E le ni tamai malo, nei malo...

- E le ni tamai pupusa le faapalopalo ma le faafefe mai, o nei malo....

- E le ni tamai nifo uamea...lea ua faapea mai... “**na te ‘aina ma lamupalaina, ao mea ua totoe (ua luai mai i fafo), ma soli e ona vae...**” (Tanielu 7: 7b)8vv17: “**O ia manu tetele e fa i latou, o tupu ia e toafa o le a tutu mai i le lalolagi...e tete mai.**”

Tete’e mai i e taofimau i le Atua. Tete’e mai i e ua filifilia e le Atua mo lona finagalo fataunuuina.

vv18: A o le fuaiupu e 18 ua fai ma AUTU o le Fono Tele... “(Ae maua le malo e le au paia a le Silisili Ese, e fai foi mo i latou le malo e faavavau, faavavau lava...”

O lona uiga, poo a mea faigata ia ua faamalumalu mai, o lo o i le fuaiupu e 18 le tali ma le faamoemoe o le tagata o le Atua - “**e maua le malo e le au paia a LE Silisili Ese, e fai foi mo i latou le malo e faavavau, faavavau lava...**”

Le Ekalesia e, o le Malo o le Atua...o le malo e maua e le au paia a LE Silisili Ese... ua i ou aao lava lea.. Aua e te fefe. Aua e te faafiti.. Aua e te solomuli. E le o se isi lava na na aumaia o le Atua Silisili Ese lea ua Ia folafola mai.

### F A A M A T A L A G A MULIMULI

1. AISEA na filifilia ai lenei AUTU e taula’i ai le tofa saili a le

Ekalesia ma le Fono Tele, i lenei tausaga - a o faafeagai ma Papelonia, Metai & Peresia, Malo Eleni ma le malo o Roma? (o ata manino o mea faigata ma puapuaga o le olaga, o faafeagai ma luitauina ai tagata o le Ekalesia a Iesu keriso..)

Ua valoia i nisi talanoaga... ‘Toe lava o le EFKS o loo iai le valoaga faaperofeta; le feau amiotonu-faaperofeta o loo finagalo iai le Atua mo lana Ekalesia i lenei seneturi (o le EFKS – o le tino paia o le Ekalesia Aoa o Keriso i le lalolagi.)

Toe o ia (le EFKS), le i’uleo faaperofeta mo le amiotonu a le Atua, o loo IA saili mai mo ona tagata faatuatua e galulue pea ma le onosai, lototetele ma le le solomuli gofie.

Le Ekalesia e, (Tanielu 7:7ff – (o la’u faaliliuga lea)

- ‘e le lamupalaina oe’ (tulou)... e nei manufeai i ni o latou nifo uamea

- ‘e le luai oe i fafo (tulou); ma soli i vae (vaeane)

- AE A? Fuaiupu 18... “Aua e maua le malo e le au paia a LE Silisili, e fai foi mo i latou le malo e faavavau, faavavau lava..”

O le mea tonu lena o lea e tau faimai ai Tanielu – o le fesootaiga a le au paia a LE Silisili Ese.. ma le Mamana, Mamalu, le Mana ma le Silisili Ese, o IA lava (le Atua)...o loo faaali mai.

- E fiu Papelonia, e fiu Metai & Peresia, e fiu malo o Eleni, e fiu le maemaea o le malo o Roma - e le masofa le ma’atulimanu (o Iesu lava lea), pe a tu’u-faamuamua;



# PEPA FONOTELE MALUA 2019

## “Faaaliga o le Mana o le Silisiliese”

### Revealing the Power of the Most High

**tuufaasili** sei vaavaai pea i ai Serupapelu ma ona tagata. E malo le fausiaina o le finagalo o le Atua (malumalu); tusa poo a mea e taumafai e faaleaga mai, ma faavaivai mai i le olaga; tusa poo ai e faasagatau mai..

**“Afaai e au le Atua ma i tatou, o ai se faasaga tau mai..?”**

E tele isi mea ou te fia faaliliuina i ai le manatu lea o Tanielu, ae ou te faaeteete i mea ane ua aami au e le Au Toeaina (a o lea o le a ou penisione).

#### **TOE MANATU** **O LE MEA LENA NA SESE AI PETERU (& SO’O)**

- E faatonu atu e Iesu Peteru.. **“e toe tuu i tai le vaa i le loloto) ma toe lafo le upega..”**

- Ae toetoe lava a faapea mai Peteru: “Iesu e...A toe fai foi, ua ao le po e leai se mea e maua.

- E te silafia ea...o au o le tautai, o tautai? Ou te iloa lelei ogasami e fagotaina o le vaituloto. Ua atoa le po, ua tigaina foi, e leai ni mea ua maua...” (toetoe lava a faapea mai Peteru: “O ai se isi potu e sili atu..? Ua na’o a’u lava. O a’u o le tautai.. O a’u o le faletua o le Toeaina..O a’u o le to’alua o le faifeau.”

- Pau le mea lelei a Peteru na fai, o lana upu: **“A ona o lau fetalaiaga... ou te tuu ifo ai le upega..”**

**A o le a’oa’oga a Iesu i lea tonu lea:**

- **“Toe tuu le vaa i le loloto..”**

- ‘Peteru, afaai e te potu...ae ua saga tutupu o le a mea faigata e feagai ma outou, aisea ua leai ai ni mea tou te maua? Ona o lena tou te fagogota i le papa’u. Ua e manatu lava o oe e te potu, o oe e te lelei; o oe ua lava ma toetoe.

- **“Tuu le vaa i le loloto..” (koma), ... ma tuu ifo ai le upega.. ma maua ai i’a.. (piriota).** E taua tele faailoga na o le gagana, pe a faaoga faatasi ma le fetalaiaga mamana lenei ale alii (o le Tautai, o tautai..).

- **“Peter, surge out into the deep; go deeper”.** Saili i le loloto. Tuutuu le tofa ma le uta i le loloto faale-Atua. **Vaai le ma’atulimanu – O Iesu Keriso.** O IA lea ua fetalai, “O oe o le tautai mo tagata/agaga. E le o ni i’a, e sese le mea lena e te oso ma fagota ai, e le o le malo lena o le Atua na tofia oe i ai (ua e soona malo-vale i atamai e fiu ai i mea a le lalolagi).

- **“Toe vaai i lou faatuatua, o lou faatuatua e saili i mea loloto o le malo o le Atua.”** A e le o le fia-tama ma teine malo-solo (ae sese), i mea papa’u o le aloalo, na o tiftifi ma tu’u’u e maua ai.

- **E le leaga nai i’a laiti...** ae finagalo le alii mo oe Peteru e te maua taitaia laui’a tetele ma le iloga; ia toso mai lou upega-saili, a ua masaesae i le tofa e loloto ma le utaga e o’oo’o, aua agaga faamaoni, aua agaga e lototetele, agaga e vaavaai pea i le maatulimanu aupitoaluga, o le Alii toetu manumalo.

Le Ekalesia pele e, a oo atu ma le faaaloalo se leo vaivai faa-tinā, tau ia o se ula e le ula.

#### **ALOFA:**

- Taofimau lau i’umaea o le faatuatua i le Alii Toetu Manumalo, o Keriso Iesu

- Silasila ane i lau Ma’a Tulimanu Aupitoaluga – o IESU KERISO lava lea, aumai e tuu faamuamua i mea uma e te finagalo iai. Ma mea tatou le faafeagai. E te manuia ai.

- Toe tuutuu lou sa i le loloto i lau faatamasoa-aliiga faale-agaga, auā agaga mo le malo o le Atua.

- ‘O le toto masaa o maturo... o le fatu lava lea o le Tala Lelei’ (o lou tautiga saili –malo, e le galo i le Atua).

- Aua e te faavaivai. Faapito i luma lou soifua tatalo faatauana, e pei o Tanielu.

#### **FAAFETAI MULIMULI**

1. Faafetai i le Laulau a le Fono Tele mo le avanoa matagofie mo le mafutaga Aoa o Tinā, ua saunia ai lenei pepa.

2. Faafetai tele mai le ta’ele o lou loto i le Afioga i le Ta’ita’ifono, le Laulau ma le Mafutaga Aoa o Tinā o le Ekalesia, ona o le tofia o lo’u tinā faatauavaa, mo lenei galuega taua. Faafetai! Faafetai lava! !

Soifua ma ia manuia taualumaga o le Fono Tele, o loo toetoe.

“Ia i le Atua lona lava viiga..”

Saunia:

**Terri Slade**

**(Sui Mafutaga Aoa o Tinā EFKS)**

---

# "FETU'U TU'UNAI MUNIAO"

---

Tusi Faitau: Fa'aaliga 22 : 1  
"Ona fa'aali mai lea e ia ia te  
a'u le vai tafe manino o le vai  
o le Ola, e manino pei o le  
ma'atioata..."

So se mea e iai le vai, e iai ma le Ola. Leaga o le definition lea: *'Water is Life' or 'Life is Water'*. Ma e le fesiligia le matua manaomia e le tino o le tagata le suavai, auā o le 80% o le tino o le tagata o le vai. Aemaise le olaga lautele i mea e mana'omia, e tausi ai le ola, e tele le sao o le suavai i le soifua ole tagata. E mafai ona e le 'ai i aso e tolu, ae le mafai ona e le inu i aso e lua.

Ma e le tioa a fa'atusa e le gagana a le Tusi Paia lo tatou Ali'i Fa'aola o Ia o le Vai o le Ola, mo le tagata. E le o le vaipaipa la, po'o le vaitimu. Ae o Lona mana fa'amalolo, Lona mana fa'aola, le mana o le Toe Tu, ua fomai'a ma laveaina ai le tagata agasala ua salamo.

O le Fa'aaliga na iloa e Ioane, fai mai o le Vaitafe (vai ole Ola), e manino e pei o le ma'atioata, ae tafe mai i le nofoali'i o le Atua, ma le tamai mamoe. O lea le vai tafe lea? O le Vaitafe o le Ola, Vaitafe o le mana fa'amalolo ole Atua, Vaitafe ole Alofa Tunoa ua tafe mai ma le mana, tafe mai ma manuia, mo e ua manumalo i le tausinioga. O e sa tutu poupou, ma le

fa'amaoni i la latou tautua ile talalelei ma talia sauaga ona o Iesu Keriso ma Lana Ekalesia.

Manatua, o le va'aiga lea na iloa e Ioane, e le se mea na tupu i lalo nei. O le Fa'aaliga o mea e tutupu i tala atu o le tu'ugamau. Le lagi & lalolagi fou (Ierusalem Fou). Fai mai o le moa o le vai tafe lea e tu ai le La'au o le Ola, e 12 fuata e fua ai, e tofu le masina ma le fuata. O lona uiga, e fua i le tausaga atoa. Ae fai mai, o ona lau e fa'amalolo ai Nu'u... O lau o le La'au ole Ola lea e fa'amalolo ai ma'i eseese. O lea le uiga? O le fa'amalolo mai i tiga, (fa'aea mai mafatiaga) o le fa'amanuiaina lava lea, ole au-kerisiano sauaina, o e na tutumau ma le fa'amaoni ma manumalo i tiga ma matuitui o le talalelei, lea ua sauni e pale i manuia o le Tamai Mamoe a le Atua i le Lagi Fou.

O ataata o le manuia lea, fai mai, e le toe i ai se fa'afano, o lona uiga e le toe iai ni fetu'u, pei ona fetu'u e le Atua, Atamu, Eva ma le gata, ona ole agasala. Ua tea ese i latou ma le malaia. O ana auauna, fai mai e auauna ia te ia, ma latou va'ava'ai i ona fofoga, e i o latou muaulu lona suafa. Manatua le saunoaga a Iesu i le mauga... *'E na'o e loto mama, latou te iloa atu fofoga o le Atua'*. O le uiga lena o le Ola Fa'avavau. O le nonofo fa'atasi ma le Atua o le

Fa'avavau, ma va'ava'ai ile mamalu o Ona fofoga ma fa'asoa fa'atasi ma Ia le olioli o ona manuia o le fa'avavau. E le gata i lea, ae fai mai e le toe iai se po, e le toe aoga se moli, po'o le la, aua ole Ali'i e fai ma malamalama. O le a lona uiga? O foliga matagofie na o le manuia e fa'avavau lea e tausinio uma iai le au fa'atuatua. E a, e te fia iai?.

Fa'aaliga: O se ufiufi, ua susu'e, ae sei fa'aali mai mea lilo o lea tutupu amuli. Mea o le Malo o le Atua. O le uiga lea o le Fa'aaliga na iloa e Ioane i le Motu o Patamo. O mea ua fa'aali mai e le Agelu, e tusi ma ta'u atu i tagata uma.

1. Ia fai ma fa'amalosi a'u i le au-kerisiano sauaina ona ole talalelei, ia tutumau ile fa'atuatua, ma le fa'amaoni, seia o'o ile iuga. (Fatu lea ole Tusi o Fa'aaliga)

2. Ia fai ma luitau mo tagata o lo'o fa'atalanoa pea, ia faitau ma talia le fetalai mai ole Ali'i.

E fitu Ekalesia i Asia Itiiti na tusi iai le Agelu, e fitu tu'ugamoli auro, e to'afitu agaga, ma fetu e fitu, e fitu fa'amaufa'ailoga. O le tamaimamoe, e fitu ona nifo ma ona mata e fitu. O agelu e to'afitu ma pu e fitu, o mala e fitu, aemaise o fa'aamuia e fitu o i le Tusi o Fa'aaliga.

O le numela fitu o le numela Paia, numela atoa, i le gagana Eperu. O lona uiga o le feau ole Tusi Fa'aaliga, e le na'o Ekalesia e fitu i Asia Itiiti, ae ole feau mo tagata

---

# **“FETU’U TU’UNAI MUNIAO”**

---

uma i so’o se lanu, so’o se gagana, i so’o se Atunu’u, ma so’o se augatupulaga, i so’o se mea. O lona uiga, o tatou isi kerisiano na mafua ai le tusi o Fa’aaliga. Leaga, e le ese le talalelei lea na sauaina ai le uluai ekelesia, ese le Keriso

manumalo, lea tatou te fa’atuatua ma auauna iai.

O manuia na folafola iai latou na, pe a tumau ma fa’amaoni, o tatou foi lea, inei augatupulaga, pe afai tatou te tutumau ma fa’amalolosi i le galuega a le Ali’i ma le loto salamo.

Fai mai Paulo ia Korinito... *“O lenei, o’u uso pele e, ia outou tumau ma le le fa’age’etia, ia alualu lo outou fa’amalosi i le galuega a le Ali’i ma le le aunoa, ina ua outou iloa e le se mea fa’aleaoga lo outou tautiga i le Ali’i.”* Ese le manaia, ae le faigofie...

KenetiLeaupetele T. (F.S.)  
Savaia&Tafagamanu—Uta.

---

## **ANOFALE FAALEAGAGA**

---

### **FAAMALOSI:**

O lona fitu lenei o masina o le tausaga; ma o loo tatou taula’i atu pea i le aga’i atu i luma o lo tatou olaga ma la tatou malaga i lenei tausaga. E tele ni mea e mata o le a tatou fetai’i; ua ta’ua i luga nisi o mea e tolu pe mata e aogā mo la tatou sauniuniga.

**FAAMALOSI:** O se upu lenei e matuā tāua ma le fia faalogo i ai. Ua masani ta’ita’i o galuega eseese ona lapata’i atu i le au faigaluega i lenei lava upu; ia Fa’amalosi auā o se tasi o fili faigata o le olaga; o le Fa’avaivai. Afai la e faalogo atu le tagata vaivai i lenei upu, e peiseai o se fafagu ua toe lagaina ai le mafaufau ina ia faamalosi i le galuega. Le ekalesia e, ia tatou faamalolosi i lenei tausaga. O i ai a tatou fe’au ua tuuina mai. O le ekalesia i ana galuega, o mālō foi o le atunuu i a latou feau eseese. E mamafa pea a tatou avega, a e ao lava ina tatou faamalolosi, auā a tatou lavea i le faavaivai, ona tatou le mafaia lea ona faataunuu faamoemoega mo le manuia o le **Ekalesia ma le Atunu’u**. O le tasi lenei o a’oa’oga maualuga a

### **GALUE:**

lo tatou Alii o Iesu ua tuuina mai i ana lapataiga uma ia i tatou. Ia loto tetele ia faamalolosi. Na ia fetalai manino mai, *“E maua outou e puapuaga, a ia outou loto tetele ua ou manumalo i le lalolagi.”*

Le au uso e, ua tofi le tagata ma mea faigata i lana galuega poo lona olaga, a ia outou faamalolosi ma loto tetele, ‘aia nei malo le fa’avaivai i o tatou loto; ‘aia nei malo le faapalapala. O se tasi o fili faigata o le galuega a le faifeau, o le faapalapala lava lea, Tu i luga, savali atu i luma, tago i auupega, fai le galuega.

**GALUE:** E to’atele ua naunau i le fia maua o galuega. O le mea lelei lea, auā e ao ina maua ni galuega e galulue ai. A e peita’i, e i ai nisi, a maua le galuega, ona le matua naunau lea e galue, a ua paiē, O le Paiē, o le tasi foi lea fili faigata mo i tatou. Ua tatou iloa, o lo tatou tofi na tuuina mai, talu mai le amataga lava, ia galue. O le a le mafai ona tupu se mea lelei, pe a le galulue tagata. Pe faapefea ona tatou vaai atu i se mea matagofie pe a le tago e fai ma galue i ai. Pe se mea lelei ea ona maua o le galuega, ona tele ai lea i le moe, a e le galue? O se mea matagofie i le vaai, le iloa atu o se tagata o punou i lana

galuega. Ua fia maua se tupulaga faapena i le atunuu atoa foi ma le Ekalesia. E ui lava ina i ai ni auupega lelei i nisi e agavaa ai mo galuega, a e a le galue ma faaaogaina lelei, o le le aoga lava o le mea leaga i se tagata, pe a na o upu e mamafa i ai, ae le galue. Galue ia, tago i ai, ia afu lou muaulu i le galuega, auā o lo tatou tofi lenei mai le amataga, ma o se mea lelei lea mo i tatou.

**LOTOLELEI:** E ui ina e Faamalosi. E ui foi ina e Galue, ae a leaga lou loto, Talofa e, o le a le manuia au taumafaiga uma. O le ma’i lenei ua faaleagaina ai nisi e to’atele o loo faamalolosi ma galulue i a latou galuega. O le mea lea sei tatou mataala i lenei faamaileaga o le loto leaga. Afai o le a leaga le loto, ona maumauina lea o mea lelei uma. O le loto leaga, o se vai o’ona lea, ua sasa’a i totonu o se puna o mea lelei. Na matua silafia lelei lava e Iesu lenei uiga; o le mea lava lea na matua tele ai lava ana lapata’iga ua tuuina mai ia i tatou. O le mea sili ona faigata; e ui lava ina ua tatou iloa le leaga o lenei mea; a ua le mafai lava ona tatou ‘alo ese ai; O le mea lea le au uso e, Teuteu ia lelei lou loto. Ia maua le Loto lelei le loto manino, le loto mama, le loto maualalo; ona manuia lea o lou Fa’amalosi i lau galuega; auā ua faavaeina mai i le Loto-lelei.

Faamanatu mo oe ma a’u.

**Saunia:**

**Vaalotu Nafai Taulapapa (FS)**

# ITULAU MO TUPULAGA TALAVOU

## "IA OLA I LE AGAGA E MANUIA AI"

**(Kalatia 5: 25 – 36)**

*Afai ua tatou ola i le Agaga, ia tatou savavali foi i le Agaga. v.26. Aua nei avea i tatou ma ē mitamitavale, aua nei felu'ia'i aua nei felosia'i.*

O fautuaga matuā aogā i tupulaga ma tatou uma foi, o uiga ma lagona e tupu pea i le tagata i le olaga o aso uma. O le ola mimita, fia malosi ma lui ai le isi tagata. O le felosia'i, ola fia iloa ma loto leaga i mea e fai e isi, ona taumafai lava lea e ola pei o isi ia latou teuga ma aga ae le mafai lava ona tutusa. O le mea lea ia e loto malie ma loto faafetai i le mea ua e iai.

Ia fua ma faatatau le mana'o i mea ua e maua ma e mafai ona fai. Ona to'afilemu lea o lou loto ma e fiafia.

E iai fua o le Agaga e tai ala ma faatonutonu ai le tagata ina ia manuia ai.

Kalatia 5:22 – 24:- Ao fua o le Agaga, O le alofa o le olioli, o le filemu o le onosai o le mataalofa, o le agalelei, o le faamaoni ma le amio mama, e le faatulafonoina mea faapena. Ao ē o ia Keriso, ua faasatauroina e i latou le tino ma ona mana'o, ma ona tuinanau.

O le elemeni tupu pea i le tagata i aso uma. O le fetuleia'i. O ona mana'o ma lagona i le loto. Ua mana'o le tino e faamalie ma faatino ona lagona ma mana'o, ae a le faautauta ma fuafua lelei le mana'o e i'u ai ina mataga ma tauvalea ae le na o ia, e tau ai matua, o aiga ma nu'u.

Ae ao ina tatalo, i le tatalo lea. "Le Alii e, le atamai ma le malosi e pulea ai ou mana'o ma tuinanau ae ou talia le galuega alofa a lou agaga musuia ai pea a'u i taimi uma ma taiala o fua o lou agaga ua tauina mai e le Aposetolo o Paulo i le ekalesia i Kalatia, mo au foi ma le au faigaluega uma lava. Soifua ma ia manuia.

### **Tusia:**

**Solomona Tuatagaloa  
Faifeau Toeaina Penisione  
Malolo.**

## **TAUTALA SO'O & TAUTALA UMI**

O le uiga masani lava lea i le olaga, o le tele o taimi e faamalamalama ai se mataupu poo se mea e ao ina faia. Faataitaiga o le fa'aausi ma lona faiga.

Aumai le talo, vavalu fai le lapa ona olo ai lea, valu le popo tatau i le tauaga, maua le pe'epe'e. O le talo ua uma ona olo, tuu i totonu o se tanoa po'o se apa ona vau lea ia maopoopo, aumai le lau fai ua uma ona lalagi, afifi ai, ona tao loa lea i le umu. A fue le umu ua vela faapapa, aumai tipitipi faalaiti ma tu'u i se apa. Ona tolo lea o le suka pe susunu i se ma'a vevela o le umu, sasa'a i le pe'epe'e ma tolo ai,

pe faausi i se ma'a vevela le niu. A maea ona sa'asa'a lea o le pe'epe'e ua uma ona susunu i luga o tipitipiga talo i totonu, o le apa. Maea loa sauni loa e taumafa.

Umi le faamatalaga o le faiga o le faausi, peitai e tasi lava le faatinoga, iloa ma malamalama le faiga, e le galo foi. Lea o le faamalamalama ma faapupula le faiga o le faausi. Faatino ma fai ae vaai iai le tupulaga.

Fiu e ta'u atu so'o ma faamalamalama le amio lelei e tatau ona fai, ae leai lava, ae tasi lava lou faatinoina o mea lelei e te faia matua malamalama ai lava.

Lea ia taiala i le olaga ma mea e a'oa'oina atu i fanau ma tupulaga amata ia te oe le tamā ma le tinā i faatinoga lelei.

*"Tasi le faatinoga e sili atu i upu e tele tau faamatala ai. One action, much better than many words explaining."*

E le gata na o tupulaga a'o le au faigaluega foi, aua le tele i upu ma faamatalaga ae faatino mea lelei o e ta'u atu e oe. Manuia le aso.

### **Saunia:**

**Solomona Tuatagaloa  
(Faifeau Toeaina Penisione  
Malolo)**

# TALA MO TAMAITI

## O LE TALA I LE TOEAINA MA LANA FAATOAGA.

Sa lelei pea tausaga ia i le faatatau i le timu ma le la mo le eleele. A ua tupu nei se mea faigata ona o le la mala. Ua mavae lea masina, a e leai lava se timu na to mai. Ua talatala tagata ma faapea: “Afai e le timu o le a tupu se oge.” Ae peitai sa latou le manatu mamafa i ai, sa latou faapea e le oo mai se oge moni, o lea ua latou faamaumau pea a latou mea e ‘ai e tusa ma le masani.

A ua amata lemu ona tupu se oge, ua tupu pea seia iu ina matua mamafa ma matautia lea oge e pei ona lei tofotofoina ai le atunuu i tupulaga e tele ua mavae. Ua iu ina faaleai ni mea ‘ai sa i ai, a ua tigaina tagata i le fia ‘a’ ai, a e leai se mea sa maua, ua latou ‘a’ ai i pa’u laau ma le mutia ma isi mea faatauva.

E faapea foi le nuu sa nofo ai le alii o Tafaiiloa, sa matua tele le puapuaga na tupu ona o le oge. Ona potopoto mai ai lea o matai o le nu’u, ua latou tofia se savali ma auina atu ia Tafaiiloa e faapea; “*Alii e, o lau afioga pe e te le silasila i le mea ua puapuagatia ai le nuu nei, ua matou lailoa i le fia ‘a’ ai, sei e foaina mai ni mea taumafa.*” A ua nofo filemu le alii ma tali atu. “*Pe ana galulue outou, e pei ona ou faaali atu i aso ua mavae, po ua matua lava nei a outou mea taumafa. A o au ou te pipii i le afioga a le Atua e faapea: O ē ua paiē ma lē galulue, e le tatau foi ona latou ‘a’ ai.*” Ua tali atu i ai le failauga: A nei e te tauemu i lo matou

puapuaga. Ua toe fai atu Tafaiiloa: E leai, peitai a fia galulue outou, o le a maua foi mea ‘ai. Ua foi le savali ma le tigā o latou loto, ma ua faali atu upu uma a Tafaiiloa i le fonu. Ua tigā foi alii uma, ua faapea: ‘Ua matua faalealofa lava Tafaiiloa, e le faapea le masani a lo tatou atunuu.’ Ua latou auina atu nei taulelea i alii eseese e faigaluega ai, ia maua ai mea ‘ai. Ua talia foi nisi e alii faatauola, ma alii pule i faatoaga; aua e ui ina ua faaleai ni galuega e tele i aso ia o le oge, a ua talia pea isi e alii, ona ua latou iloa le puapuaga sa ootia ai le nuu. A o isi e toatele na le talia foi, ua fai atu i ai o alii: “O aso ua mavae atu sa puapuagatia ai a’u i galuega e tele, sa fia maua outou e fai galuega a e totogi, ae sa le mafai outou, sa fia taoto ma malolo, o lea sei outou o ese nei, aua e leai se galuega. Ua le toe aoga nei outou.” Ua faapea ona foi mai taulele e toatele i o latou nuu. Ua vaivai le tino i le fia ‘a’ ai, ua lailoa i le malaga, ua vaivai le loto, ua fia oti.

Ua alu Tafaiiloa i lana uo toeaina, la te talatala i mea uma ua tutupu. Aua e ui ina ua ia teena le savali a le nuu, ma faataga le alofa i ai; a ua mu lava lona loto i le alofa mutimutivale, sa leai se manatu na te tuua le nuu i lona puapuaga. Peitai sa faapea lona mafaufau, ia avea mea ua tutupu, ma ala e liliu ese ai le nuu mai lo latou sese. O lea ua la filifili ai ma lana uo. Ua faapea le taofi o le toeaina: ua sa’o lava le mea ua e faia, o le a ta vave iloa lona aoga; auā ua ou mautinoa, o le a latou toe foi mai.”

O le aso taeao na sau ai le aumalaga mai le isi motu, auā na

vave ona salalau le tala, i le va na tupu ia Tafaiiloa ma lona nuu. Ua faatoa iloa foi se tala faapena, o le faale-alofa o le tasi uso i lona uso tagata. O lea ua tupu ai le manatu, latou te faaaogaina lenei va ma tagi atu ia Tafaiiloa, ona o le galuega ma mea taumafa. O lea ua uma ona feiloai i upu sa masani ai, ona faapea loa lea o le failauga o le au malaga i tagata o le nuu; E le o outou matou te asiasi i ai; a o Tafaiiloa, ua i ai sa matou feau ia te ia. Ua latou o ia Tafaiiloa ua talia lelei e ia, ua ia faailoa atu ia te i latou ana faatoaga; sa ofo lava le aumalaga; aua peiseai e le afaina le faatoaga i le la mala. E tele fua o niu sa i ai, ao oganiu sa faale-mauauga tele, peita’i ua pupuu ma ua lapopoa. E tele ‘ulu sa i ai, o laau mafala foi, a e tele le fuata ‘ulu sa i ai e a’e gofie foi. E faapea foi fai ma talo ma ufi, e matua olaola lelei, ma ua faulai lava o mea ‘ai e tele.

Ua foi ma le aumalaga i le fale, latou malolo, ona tulai ai lea o le Failauga ma fai lana lauga. Ua faapea ana upu: Ua matou faalogo i se tala, ua e sailiili taulelea latou te galulue i lou fanua. Ua mafai ona matou tuuina atu ia te oe le to’a selau pe afai e te avatu i ai mea taumafa e fai ma totogi, aua e tele le oge i lo matou nuu. Ua tali atu Tafaiiloa, se i ou mafaufau i ai i sina itula puupuu.

A o faia ia mea, faauta o loo tilotilo ma faalogologo mai foi se tasi taulelea mai le nu’u o Tafaiiloa i lea mea. Ua ia faalogo atu i le ole atu o le aumalaga ia Tafaiiloa, e fia avatu i ai le au faigaluega e to’a selau; ona momo’e ai lea o ia i le fale tele sa alala ai alii ma tulafale, ua musumusumu mai i tua i le taliga o lona tama lea tala, a o lona tama ua ia faaali atu i isi lea tala. Ua faatoa uma se lauga a le tasi tulafale poto, ua i’u faapea – ia latou toe taumafai se leleiga ma Tafaiiloa. Ua talia lelei ia upu, ua

---

# TALA MO TAMAITI

valaau isi, e lelei ona toe fai se lelei ma Tafaiiloa a ia tulieseina le aumalaga. Ua tupu ai va, i le ua fa'avave foi isi taulelea lotoa ma fasi laau ma maa latou te tau ma le aumalaga.

Ua iloa lea mea e le Failauga, ona ia tulai lea ma vavao i ai ma le leo tele: 'Aua nei fai se mea i e ua ta'ua malo a le Alii o lo tatou nu'u. A o au nei, ou te alu nei e toe sauniuni le toe leleiga. Poo se a se upu ou te fai atu i ai? Ua tali i ai le Fono: Sei e faaali atu ia Tafaiiloa, o ia o lo matou tamā, o i matou o lana fanau."

Ua alu le Failauga ia Tafaiiloa, ua talia lelei i lona maota, ua faapea le upu a Tafaiiloa, sei faapotopoto mai le nuu uma i ona luma. Ona faapea lea ona fai. O alii, tulafale, taulelea, fafine ma tamaiti, ua latou potopoto uma mai ma valaau: O oe o lo matou tama, o i matou o lau fanau, so o se mea ua finagalo i ai matou te faia lava.

Ua faalogo Tafaiiloa i lea upu, ona tupu ai lea le fiafia aliali, aua o lea lava upu, na ia faatalitali i ai i tausaga e tele. Ua ia alu i lumafale, ua fai atu: La'u fanau e, o le aso taeao, tatou te fa'asaga ai e faatuina faatoaga i le nuu, e pei ona aoaoina ai o au e lau uo toeaina. A o le aso nei, o le aso tatou te fiafia faatasi ai. Taulelea e, ia sauni e outou le 'ava ma le taumafataga mo le nu'u uma, ia leai se tasi e aunoa ma le fiafia ma mea taumafa.

Ua alalaga fiafia nei le nu'u. Aua fai atu Tafaiiloa i le aumalaga mai le isi motu: ou te le mafai ona talia la outou tagi. Ua lava le aufaigaluega ua maua, sei silasila i ai. Ae ui i lea, faatumu pea lo outou va'a i mea taumafa, ou te avatu

foi se taulelea na te a'oa'oina outou i le faiga o faatoaga e pei ona silasila outou i la'u faatoaga. O aso nei e lelei ona ta laau, a oo i aso vale ona faatoa to mai ai lea o timuga; ona lelei ai lea ona totoina tamai laau, ou te foai atu ai ia te outou, afai e filiga outou e leai se toe oge e tupu.

Ua loto malilie foi le au malaga i lea upu a Tafaiiloa, ua fiafia faatasi ma le nuu, ma vivii lava i le atamai ma le mafaufau o Tafaiiloa, o ia e tusa ma Iosefa i Aikupito, sa faatupuina mea o saito, ina ia lava mea taumafa mo le oge. A ua le galo foi ia Tafaiiloa lana uo toeaina, ua ia valaauina o ia na te sau i le fiafia a le nu'u, ona atili ai lea le olioli.

Ua salalau lea tala i le atunuu, ona mana'omia atili ai lea o taulelea a le aiga o Tafaiiloa e fai ma ta'ita'i i le faatuina o faatoaga i aai eseese. A viia, ua mamalu lava i latou, ona ua latou usiusitai i lo latou alii.

Sema e, se a le mea e ala ai ona tusia leni tala! Ina alu ia ina faapea ona fai. O le Tala lena e pei ona taua i luga, i le toeaina ma lana faatoaga; o le tala lea na siitia mai i le sulu o Mati ma Me o le tausaga 1911. Sa tusia lea tala e Kaufemani Lagalaga, ae faa-samoaina e Misi Aita.

Ua i ai se manatu, a o tatou feagai ma le faigata o le olaga i nei aso, pe le aogā ea leni tala atonu o le afai ma mea e toe fautuaina ai nisi i le itu lava o le olaga paiē ma le lē fia galue. I le ma lea, atonu o le a tatou talitonu ai i le soona toto o a tatou faatoaga, a e le fai ma faautauta i le tulafono o le totoina o laau. Atoa foi ma leni; ia manatua le tulafono o le elelee. O mea uma mai le elelee ia toe faafoi

i ai. E taua lea tulafono ma o le afai ma mea, e ui ina itiiti sina faatoaga ma sina laueleele e fai ai, ao le a tumau pea lona lelei o le fanua ma le elelee pe a tausi i le tulafono.

A e le gata i lea, ua fai foi leni tala ma mea e toe faamanatu mai ia i tatou le aogā ma le taua tele o fa'atonuga ma lapataiga ua tatou maua mai i le malo, e ala mai i le Ofisa o Fa'atoaga. E moni lava, ana mafai ona tatou faaaogāina uma ia fa'atonuga, semanu ua tatou le maua ni fa'alavelave tau mea taumafa, atoa foi ma fua o le laueleele e faatau i fafo mo le manuia lava o le atunuu. I le ma lea, atonu o le a fai leni tala ma mea e unaiina ai loto o nisi e le o manatu mamafa i le faiga o faatoaga, a e na o le nofonofa lava ma faamoemoe e alu e ave mea a isi ma ia. Tatou liliu atu ia e faaaoao ia Tafaiiloa ma lona aiga e pei ona taua i le tala, ona tatou le toe popole tele lea i le oge i mea taumafa. E tele a'oa'oga i leni tala, a e tuuina atu ia ia te oe e te toe faitau maea i ai ma mafaufau ai i mea aoga mo oe ma lou aiga. Ia manuia tele fanau uma a Samoa, aemaise le Ekalesia Aoao.

Soifua

**Ruperake Petaia (FS)**

---

**QUOTE:**

**John 15:13**

**Greater love has no one than this: to lay down one's life for one's friends.**

**\*\*\*\*\***

---

# O E UA FAI'ILAGI LE FOLAUGA

## **TUAIMALO PAPALIITELE PISIMAKA LEOTA TOOMATA**

20 Tesema 1939 - 3 Tesema 2018

Na soifua mai i le Aso 20 Tesema 1939, ae valaau lona Matai i le Aso 3 Tesema 2018. O ona matua o Leota Toomata Papalii Pisimaka ma Eti Sooalo Leota Papalii. E to'atolu ona uso ae to'afitu ona tuafafine. Sa faaipoipo atu ia Solialofi Saia Enesi Tupai o Tuanai ma e to'avalu o laua alo. O le aofai o i latou na tutupu mai i le tamā e 34.

Ose tamā e faagalogata i le loto faapea mea fai a lenei Ekalesia, e ui i lona soifua matua ae taulamua i mea fai a le Ekalesia. Ose tasi o sui o le aulotu na latou faaoo atu lo latou filifilia o i maua e fai ma latou faifeau. Sa tusi aao iai le Ekalesia e fai ma o matou ta'ita'ifono, sa avea foi ma failautusi faapea le tofiga teutupe, ma e silia i le 30 tausaga o tautua i ia tofi o le Ekalesia. Sa fai foi o ia ma ta'ita'ifono o le Aufaipese. Ao sauni fonotaga a le Aulotu, e muamua talanoa mai ia te au i so'o se mataupu i sou manatu, ma e na te lagolagoina sou manatu vaivai. E tele ni gasegase faigata sa poia

ai o ia, peitai o se tagata e tali gasegase. E le taofia ai ona tiute faatama i totonu o lo latou aiga aemaise le aiga potopoto, e molimau uma lona aiga i le osi aiga o le tama, e iloa foi i le toatele o e sa auai i lona aso fiafia. O Tuaimalo e fiafia tele i taaloga e auai ai tama fanau a lo tatou atunuu, ae faatitino lava i le taaloga soka o loo fiafia iai tupulaga a lo matou nuu.

O se tama e lagolago i le galuega a le faifeau ma lona to'alua. E galue lelei ma faamalosi i le aulotu i le galuega. E alofa ma matau i le Atua, e toaga i le lotu i Aso Sa, faatoa le vaaia tama i le lotu pe a malaga pe gasegase foi. E ui i se manatu tatou te mafuta pea, ae faia lava le finagalo paia o lo tatou Atua. Sa o matou lolotu faatasi ma le tama i le Aso Sa i le Maota Maliu o Pau Sefo Pau, ma sa maua ai le avanoa o le aulotu e molimau ai i le tama. Ao lona sauniga mulimuli sa faia lava i le Falesa EFKS i Matautu-Uta. Sa ou ta'ita'i ma fai lona molimau faale-agaga faapea le upu faamafanafana. O le aoao ia Faasootauloa Roma na aumaia lona sa i totonu ma faitau le Tusi Paia. Ao le tiakono Katoliko ia Maselino na saunia talosaga. Sa molimau lona tuafafine o Papaliitele Violet Papalii Richmond, Leota Toomata Chester Bentley, Tuaimalo Ah

Samu sui o Aiga, Nancy Faapusi Papalii sui o le fanau, ma le faletua ia Solialofi Tuaimalo Papalii Pisimaka. Sa faaiu le sauniga i lona oliolisaga tumau ma faatofa ai i le pese faatofa a le Au Faatuatua. Amuia lea auauna pe a sau lona Alii e maua mai o ia o loo faapea ona fai.

Manuia lau malaga Tuaimalo. Faafetai,

**Elisaia F Kolia (FS)  
EFKS Matautu-uta  
APIA**

---

## **SESILIA TUAIMALO MANI VAGAIA**

24 Aokuso 1945 - 27 Oketopa 2018

O le tinā tiakono o la matou aulotu i Matautu-Uta (Apia). Na fanau mai i le Aso 24 Aokuso 1945, ae valaau e lona Matai i le Aso 27 Oketopa 2018.

Sa faaipoipo atu ia Vagaia Tuaimalo Mani, ma e sefulutasi o laua alo e aofia ai ma fanau muamua a le tamā, ae sa fai uma lava e le tinā. E to'a 50 i latou na tutupu mai i le tinā. O se tinā e alofa ile aufaigaluega faifeau, e tasi faifeau, o le a se mea sili na te maua e molimoli mai lava mo maua ma le fanau. E to'afilemu ma tausaaafia ona uiga, e le lagona sona leo i mea fai a le Ekalesia, ae fai mea fiafia ma galue malosi. O le a se finagalo e tasi iai le aulotu, o

# O E UA FAI'ILAGI LE FOLAUGA




**SESILIA  
TUAIMALO  
MANI VAGAIA**

lona finagalo foi lea. E pele ia te ia lana fanau e oo lava i fanau uma a le aulotu, e naunau ma e faamalosi ile fanau aoga mo so latou lumanai manuia. Sa tele foi se fautuaga faatagata matua mo maua i le galuega ao fou mai i le galuega. Sa umi se taimi na fegai ai le tinā ma gasegase o le tino, e ui i le tiga o ma'i ae le vaaia sona mafatia. O lona taimi mulimuli sa matou fai lotu ai ma le fanau, ao usuina le pese 138 "E lou tama e, ua faafetai, ua sili lou alofa mai" Na tuua filemu ai e le tinā le soifuaga nei ae toe foi atu i aao mafanafana o lo tatou Matai sili i le lagi. Amuia le tagata faatuatua e valaau lona matai ao loo galue pea. Ua ou tau le taua lelei, ua iu ia te au le tausinioga, ua ou taofi i le faatuatua. Sa tumutumu lona

sauniga faaleaiga ao lona sauniga mulimuli sa ou ta'ita'i ma faia lona molimau faa-le-agaga. Sa saunia e le susuga i le aoao fesoasoani ia Faasootauloa Roma talosaga, ao le Tiakono Katoliko ia Maselino sa faitauina le Tusi Paia ma saunia le feau faamafanafana. Na faaiu ona sauniga uma i lona oliolisaga tumau ma faatofa ai i le faamaise a le au Kerisiano "Talofa uso e".

Manuia lau malaga Sesilia Tuaimalo Mani Vagaia. Faafetai,

**Elisaia Fiu Kolia (FS)  
EFKS Matautu-Uta  
APIA**



**TUAIMALO  
PAPALIITELE  
PISIMAKA  
LEOTA  
TOOMATA**



## *Jesus love's me! this I know*

Jesus loves me this i know

For the Bible tells me so

Little ones to him belong

They are weak, but he is strong

Yes Jesus loves me!

Yes Jesus loves me!

Yes Jesus loves me!

The Bible tells me so

Jesus love me! He who died

Heaven's gate to open wide;

He will wash away my sin

Let Him little child come in

Jesus loves me! He will stay

Close beside me all the way;

Thou hast bled and died for me

I will henceforth live for Thee